

# FRÍSTUNDAKORT - REGLUR OG SKILYRÐI

## 1. gr.

### Markmið og tilgangur Frístundakortsins

Meginmarkmið Frístundakortsins er að öll börn, 6-18 ára, í Reykjavík geti tekið þátt í uppbyggilegu frístundastarfi óháð efnahag eða félagslegum aðstæðum.

Frístundakortinu er ætlað að auka jöfnuð í samfélaginu og fjölbreytileika íþrótta-, lista- og tómstundastarfs.

Með Frístundakortinu er leitast við að styrkja félagslegt umhverfi og hafa jákvæð áhrif á þroska barna og unglinga.

## 2. gr.

### Almennt um frístundakortið og úthlutunarreglur

Frístundakortinu er úthlutað til barns í formi styrks frá Reykjavíkurborg sem lögheimilis foreldri/ forráða ~~fólkmen~~ ráðstafa í þágu þess til aðila er standa fyrir skipulögðu frístundastarfi og falla undir reglur þessar um að vera styrkhæfir.

Með Frístundakortinu má greiða að fullu, eða hluta til, fyrir íþrótta-, lista- og tómstundastarfsemi á vegum félaga og samtaka sem starfa í Reykjavík og nágrannasveitarfélögum.

Frístundakortið veitir foreldrum/forráðamönnum barna, eða þeim sem þeir tilnefna, rétt til að ráðstafa tilgreindri upphæð á ári fyrir hvert barn.

Eftirstöðvar Frístundakortsins færast á milli tímabila innan ársins en ekki er hægt að færa eftirstöðvar þess milli ára.

Félögum með aðild að Frístundakortinu er heimilt að ákvarða hve lengi á hverju tímabili foreldrar/forráða ~~fólkmen~~ geti ráðstafað styrk til þeirra.

Styrkur getur aldrei orðið hærri en þátttöku- eða æfingagjald skipulegs frístundastarfs sem um ræðir. Þá er ekki heimilt að nýta Frístundakortið til að greiða sérstakan viðbótarkostnað svo sem vegna tækja og búnaðar, fatnaðar, ferðakostnaðar.

## 3. gr.

### Skilyrði fyrir veitingu styrks til styrkþega

- Styrkþegi eigi lögheimili í Reykjavík og sé á aldrinum 6-18 ára miðað við fæðingarár.
- Ráðstöfun er endanleg. Ekki er hægt að endurgreiða eða bakfæra styrk ef foreldri/ forráðamaður hefur ráðstafað styrk til félags á grundvelli Frístundakortsins.
- Börn sem flytja til borgarinnar njóta Frístundakortsins óskerts.
- Ráðstöfunarréttur fellur niður flytji barn frá Reykjavík.

#### 4. gr.

##### **Skilyrði er varða skipulegt frístundastarf og styrkhæfni aðila**

Velferð og hagur barna skal hafður að leiðarljósi í öllu starfi og í samræmi við ákvæði laga og reglugerða er varða börn. Starfsemi aðila og hið skipulega frístundastarf, þarf að uppfylla eftirfarandi skilyrði til að teljast styrkhæf:

- a) Sá aðili sem sinnir hinu skipulega frístundastarfi hafi gert samning um Frístundakortið við Íþrótt- og tómstundasvið Reykjavíkurborgar (ÍTR) og uppfylli reglur um styrkhæfni að öðru leyti.
- b) Hið skipulega starf nái yfir a.m.k. 8 vikur.
- c) Dæmi um starfsemi sem telst styrkhæf er starfsemi á vegum íþrótt- og æskulýðsfélaga, nám við tónlistarskóla, dansskóla, myndlistarskóla, frístundaheimili á vegum Reykjavíkurborgar og skólahljómsveita. Dæmi um starfsemi sem ekki telst styrkhæf er starfsemi trúfélaga og annarra lífsskoðunarfélaga (svo sem fermingarfræðsla) og stjórn málasamtaka. Þá er nám sem er láns hæft skv. úthlutunarreglum LÍN ekki styrkhæft. Íþrótt- og tómstundasvið leysir úr um hvort einstakir aðilar uppfylli kröfur reglna þessa til að teljast styrkhæfir, og ber sína tillögu undir samþykki Íþrótt- og tómstundaráðs ef vafi leikur á.
- d) Styrk má veita til kaupa á 3 til 12 mánaða kortum á líkamsræktarstöðvum til ungmenna 15 -18 ára að aldri m.v. fæðingarár. Í upphafi skal veita iðkendum leiðsögn í notkun tækja og æfingaáætlunar. Um þær líkamsræktarstöðvar sem ekki veita skipulagða leiðsögn og æfingaáætlun í upphafi gilda eldri reglur þar sem miðað er við 16-18 ára m.v. fæðingarár. Skipulögð námskeið innan líkamsræktarstöðva, sem uppfylla skilyrði reglna þessara falla undir styrkinn óháð aldri.
- e) Ekki eru veittir styrkir vegna hefðbundinna sumarnámskeiða sem ná ekki 8 vikna lengd nema sérstök og málefnaleg sjónarmið eigi við. Íþrótt- og tómstundasvið metur hvort veita eigi undanþágu hverju sinni.
- f) Hið skipulega starf skal innt af hendi undir leiðsögn viðurkenndra þjálfara eða leiðbeinenda. Börn undir 18 ára aldri skulu ekki starfa við þjálfun eða leiðbeinendastörf í barnastarfi eins síns liðs. Aðalþjálfari og leiðbeinandi getur þó haft einstaklinga undir 18 ára aldri sér til aðstoðar.
- g) Aðild að Frístundakortinu má ekki verða til þess að gjaldskrár aðila hækki óeðlilega milli ára.

#### 5. gr.

##### **Skráning aðila í frístundakortskerfið**

Aðilar sem uppfylla reglur þessar um styrkhæfni geta sótt um samstarfssamning á heimasíðu Reykjavíkurbogar. Íþrótt- og tómstundasvið metur hverja umsókn og veitir aðilum sem uppfylla skilyrði, aðgang að rafrænu umsýslukerfi Frístundakortsins, og gerir samning við viðkomandi.

Eftirfarandi upplýsingar skulu koma fram í umsókn:

- a) Nafn, kennitala, símanúmer, netfang og heimasíða aðila nafn, kennitala símanúmer og netfang tengiliðs vegna umsóknar.
- b) Tegund starfsemi og starfssvæði félags.
- c) Starfsskrá og gjaldskrá.
- d) Upplýsingar um aðstöðu og leiðbeinendur.
- e) Allar gjaldskrár og viðbótarkostnaður sem fylgir þátttöku og iðkun á tímabilinu skal liggja fyrir.

## **6. gr. Uppgjör og skil aðila á gögnum**

ÍTR, fer með styrkuppgjör af hálfu Reykjavíkurborgar. Styrkuppgjör til aðila er í fyrstu viku hvers mánaðar og fer uppgjör fram með rafrænum hætti.

Starfsáætlun og gjaldskrár vegna komandi starfsárs þarf að skila í byrjun ágúst ár hvert hefjist námskeið að hausti og í byrjun maí ár hvert hefjist námskeið að vori.

Aðilum að Frístundakortinu ber að skrá alla þátttakendur á hverju tímabili í frístundakortskerfið, hvort sem þeir nýta styrkinn hjá viðkomandi aðila eða ekki.

Brot á reglum og skilyrðum Frístundakortsins geta leitt til samningsslita.

Reglur þessar verða endurskoðaðar eins oft og þurfa þykir.

Samþykkt á fundi Íþróttá- og tómstundaráðs Reykjavíkur 23. nóvember 2020